

Na osnovu člana 25, a u vezi sa članom 29 Statuta Udruženja Asocijacija srednjoškolaca u Bosni i Hercegovini (u daljem tekstu: Udruženje), Upravni odbor Udruženja je na sastanku Upravnog odbora donio

## **PRAVILNIK O SARADNJI** na projektu „Socijalni dan 2021“

### **Član 1.**

Pravilnik o saradnji uređuje odnose Udruženja i Partnera na osnovu Prijavnice za učešće u projektu „Socijalni dan 2021“ (u daljem tekstu: Prijavnica) te se definišu prava i obaveze pri realizaciji projekta „Socijalni dan 2021“ (u daljem tekstu: Projekat).

### **Član 2.**

Partner i Udruženje realizacijom aktivnosti doprinose poboljšanju prilika za srednjoškolce u svim lokalnim zajednicama te pružaju srednjoškolcima priliku da implementiraju projekte koji za cilj imaju rješavanje problema u lokalnoj zajednici.

### **Član 3.**

Partner se obavezuje da će obezbijediti mogućnost jednodnevnog volontiranja u svojoj firmi za dogovoreni broj srednjoškolaca. Udruženje se obavezuje da će obezbijediti potreban broj srednjoškolaca koji će jedan dan provesti volontirajući u firmi.

### **Član 4.**

Projekat će se realizirati 15.10.2021. godine (petak), a Partner je obavezan obezbijediti da kroz proces jednodnevnog volontiranja srednjoškolac/ka ima uvid u način obavljanja poslova na radnom mjestu kao i sve potrebne uslove za volontiranje taj dan. Srednjoškolci/ke, koje će osigurati ASuBiH, će na radno mjesto doći u terminu određenom od strane Partnera te tu provesti isti.

### **Član 5.**

Partner se obavezuje da će za svakog srednjoškolca koji bude radio u firmi obezbijediti minimalnu dnevnicu od 20,00 KM po učesniku/ci.

### **Član 6.**

Partner se obavezuje da će u roku od 15 dana nakon realizacije Projekta uplatiti dogovoreni iznos po Prijavnici za saradnju na račun Udruženja.

### **Član 7.**

Partner se obavezuje da srednjoškolci u toku jednodnevnog volontiranja neće raditi teške fizičke poslove koji mogu dovesti do zdravstvenih poteškoća ili ozlijeđa na radu. Srednjoškolac/ka neće biti omalovažavan/na na funkciji koju bude obavljao/la, niti iskorištavan/na i zlostavljan/na na bilo koji način.

### **Član 8.**

Srednjoškolac/ka (u slučaju maloljetnosti roditelji/zakonski staratelji) će potpisati izjavu kojom se odriču odgovornosti za bilo koje povrede koje se dese na radu. Ukoliko dođe do neke nezgode, srednjoškolac/ka neće tužiti Udruženje ni Partnera, nego sami preuzimaju odgovornost.

#### **Član 9.**

Od srednjoškolaca/srednjoškolke se očekuje da će taj dan provesti što korisnije za firmu, pomoći u realizaciji aktivnosti koje im se povjere i pokazati pristojno ponašanje te na taj način će srednjoškolci/srednjoškolke dobiti priliku da iskuse radnu atmosferu i nauče nove stvari

#### **Član 10.**

Udruženje se obavezuje da će novčana sredstva koja se uplate za realizaciju ovog Projekta, biti iskorištena za kreiranje Fonda Socijalnog dana. Udruženje će ova sredstva koristiti za održavanje projekata srednjoškolaca u lokalnim zajednicama.

Udruženje neće koristiti ova novčana sredstva za druge potrebe osim onih koje su već ranije navedene, a 20% od cjelokupnog iznosa fonda će biti iskorišteno za finansiranje „Socijalnog dana 2022“.

#### **Član 11.**

Udruženje neće podržavati projekte kojima će se finansirati kupovina opreme koja ostaje u trajnom vlasništvu, niti plaćanje honorara za srednjoškolce koji će provoditi aktivnosti u lokalnim zajednicama. Finansirat će se isključivo aktivnosti koje dovode do promjene stanja i rješavanje problema u lokalnoj zajednici.

#### **Član 12.**

Udruženje će promovisati Partnera na društvenim mrežama putem svoje web stranice [www.asubih.ba](http://www.asubih.ba) i putem medijskih gostovanja.

Partner može promovisati u medijima da sarađuju na projektu Socijalni dan 2021 i da su srednjoškolcima omogućili jednodnevno volontiranje.

#### **Član 13.**

Udruženje će biti odgovorno za trošenje prikupljenih sredstava, a donatori će imati priliku uvida u trošenje sredstava.

#### **Član 14.**

Saradnja na projektu se ostvaruje potpisivanjem Prijavnice od strane odgovornog lica ispred Partnera. Prijavnica se ispunjava u 2 (dva) istovjetna primjerka od kojih jedan ide Partneru, a drugi zadržava Udruženje.

#### **Član 15.**

Pravilnik stupa na snagu sa danom donošenja od strane Upravnog odbora organizacije.

#### **Član 16.**

Izmjene i dopune ovog Pravilnika donose se na način i u postupku u kojem je donesen i ovaj Pravilnik.

U Sarajevu, 20. 7. 2021.

VD predsjednika udruženja  
Aleksandra Đorem